

ХОНЬНА МИХАИЛ

Зөргиг зүркнд суулһдг болхнь

Тавн партизан
 тавн өдр,
Тавн сө
 йовад төмр
хаалһин харулас
 халһад ирж,
хаһлх тагтан
 эс үзж.
Үмгүлсн нохан
 ноосншң, эднә

үснь өрвэлдэд,
 нүднь оңкилднә.
Икәр әәсинь
 сәәнәр меджәнәв,
иим тууласиг
 шин үзжәнәв.
Болв дәәчнрт
 дәәнә йосн
болдас хату,
 һалас халун.

Тагт хамхллго
ирх зөв
төрүц өгсн
уга билэв.
«Бостн ормасн!» –
гиж шүрүлкэд,
буудынь авад,
хажуднь жолмлув.
«Даалһвр күцэлго
ирсндтн!..» – болад,
даласн шүүрэд,
автоматан авув.
Шөвгөр хатхулсн
кевтө өсрлдэд,
шар харһасин
өмн зогсв.
Кезэ автоматас
дун тачкнад,
киискөнө гилдсэр
теңгр хөлөлдв.
Ки уга
юмс мет
көшлдэд, ду
эс һарлдв.
Хөөр эржэх
кевтө модд
хамтхасан нульмс
дусажахшң унһав.
Нарна толяһар
хамтхасн шувтрад,
нүдим анюлж,
эдн гилвклдв.
Автоматын һадр
дарунь хучад,
алтлсн юмн
кевтө шарлуув.
Агчмд, генткн
мини толһад,
арин теегин
нег хотнд,
бичкн насндм
үзсн йовдл
барлзад, ода
үзгдсн болв:
Хальмг, ботхна
күзү даржаһад,
хоолынь керчхэр
утхан һарһв.
Ботхна эк
бәркрж ирэд,

бир төвэд,
күүншң уульв.
Өмн көлән чөклэд,
өршөлһ күүнәс эрэд,
һашун нульмсан цацв,
һазр элкөрн шудрв.
Ботхна хоолд
утхан күрглго,
белдән хальмг
хэрү дүрв.
Темөнө уйдлһнд
тесч чадлго,
тер залу
гертән орв.
Темән ботхан
босхж авад,
теегүр сальк
өрэд һарв.
Бичкн темәч –
би дахад,
ботхиг экәснь
салһлго йовуув...
Арвн тавн
жил хооран
арин теегин
хотнд тодлсим,
шар харһасин
шар хамтхасн
шар темөнө
нульмс сануув.
Ботх аллго
төвсн күүншң,
би бас
автоматан буулһув.
Тегэд негл
хальмг өвгншң,
тоолвран гүүлгэд,
бийләрн күүндүв.
«Мал мөөрә,
мөөрә йовж,
мал болдг.
Түүшлж эдн
тенд-энд
халһа йовж
төлжэд, дөөчнр
эс болхий?»
Тиигж санад,
дотран жөөлрүв,
тиигсн бийнь
эднд келүв:

«Зөргиг юуһар
болвчн арһлад,
зүркндтн суулһдг
арһ бөөхнь,
сүүдрәсн сүмс
алддг таанрт
сөөнәр дүрх
биләв!.. Медвт?»
«Медв», – гилдәд
көвүд әмнв.
«Медсн болхла,
сән. Соңстн:
тавуладтн чаңһ
шоодвр өгчәнәв,
тагт хамхллго
әәлдәд ирсндтн».
«Медв», – гисн
хәрүһәрн эдн
мини уханд
ицл орулв.
«Тавн хонгин
дунд тадн
тер тагтан
хаһлхмт», – гивүв.

...Нег өрүн
операцас ирн,
наряд бүрткж
йовад үзүв.
Тер тагт
хаһлсна хөөн
тавна толһач
негндән келжәнә:
«Зөргиг юуһар
болвчн арһлад,
зүркндчн суулһдг
арһ бөөхнь,
сүүдрәсн сүмс
алддг чамд
сөөнәр дүрх
биләв!.. Медвч?»
Тавн көвүн
өсчәхинь медәд,
теңкән уга
икәр байрлув.
Теегин мал –
шар иңгнд
толһаһан дөөнә
теегәс гекүв.